

Concierto Dominical exitoso pa celebra Lio Booi su 91 cumpleaños

Reseña skirbi pa Ruthy "Lady Ruth" Vrieswijk-Bergen



E concierto dominical pa e ultimo diadomingo di e luna di juli a tuma luga cu hopi entusiasmo y alegria. E luga tawata tjokvol. Shon Lio Booi a haya su serenata di canto y pabien pa su cumpleaños number 91 meymey di su famia y amigonan cu a gosa e dushi diadomingo aki den Manchebo French Steakhouse den un ambiente completo cu servicio atento y profesional, manera ta e custumber di e dushi hendenan di Manchebo French Steakhouse y tur biaha, e "bitterballennan" ta smaak mas bon. Otronan a savoria nan dushi apple pie, fruit punch, te of koffie of hasta un bon glas di biña pa habri e apetit pa merdia.

Hopi artista, di hoben bay ariba a duna nan bunita presentacion di curason. E.o. e hoben Jonathan Croes, cu ya ta bon conoci den comunidad pa su logronan riba tereno di canto, cu caminda habri pa hopi mas y e incansabel Robert Jeandor, un di nos grandinan cu ya sa kico ta come y bebe riba e tereno di musico cu tokenan y experiencianan internacional tambe, a cautiva e publico cu nan stem potente yen di energia. Un coronacion musical sublime tambe cu e

canto di Nilka Matos Franka, cu ta keda pa hopi "E cantante femenino reina" den boleros y of baladanan romantico cu su stem sensual y caluroso. Di berdad bo ta sinti hunto cu Nilka pa baila e danza aki, y pasa un rato bon. Su movecionnan mientras e ta canta, ta bisa bo, cu Nilka tey pa hopi aña mas, anto den condicion top. "My dear and beautiful friend, bo a luci atrobe y bo wowonan blauw berde a papia manera e spiel di bo alma den un forma alegre, gosando di bida hunto cu bo kerido Frank". "You are a very special and blessed singer, because you sing from your heart with a style that nobody else can match." Danki pa comparti cu nos di bo talentonan profesional, eherce como un di bo hobbyan dushi. ultimamente. Manera nos ta bisa den scouting " Si un cos ta bon....ta bon e ta !!"

E impacto grandi cu grupo Melange bao direccion di Maybeline Arends Croes a causa a laga e curasonnan tur inspira. Cancionnan cu bo no ta tende tur dia, pero cu ta existi. Y mas cu claro, letranan cu musica di e.o. Sr. Hubert Booi mes of di nos tata

di nos cultura Padu Lampe kende a compana su amigo Lio durante e celebracion dushi aki. - Harmonia den e bosnan tawata asina great, di e.o. Arlene Wever-Croes y Gina, Sra. de Lanooy y otronan cu mi no por corda nan nomber awor aki, pero cu tambe a canta cu hopi amor y sentimiento. Y... e dushi bolo cu no a falta, ni tampoco un storia sumamente spantoso graciosamente recita pa Vicky Booi, cu tin hopi aprecio y amor pa su suegro Lio. E spanto gracioso aki a laga hopi hende cu un sonrisa riba nan cara. Sr. Emerencia (ex-schutter , tambe di edad hopi halto caba) a dedica palabranan bunita di recuerdo di infancia, creciendo na Boneiro, como amigo mucha di Lio y con nan tur dos a bin biba y casa aki na Aruba. Tawata pa mi un placer di por a baila un piesa cu Sr. Emerencia, cu tin 92 aña di edad. Un bunita trio di tres di nos grandinan: Emerencia, Lio y Padu. God bless! Boso ta carga nos cultura semper! Atrobe e conoci Roy Sneek di Dakota tur dia a plama mas alegria cu su grupo di musico y cantantenan invita cu mas cancionnan conoci di Padu of di Shon Lio. Entre nan nos

amigo Lucio Rivadeneira y Eddy Ras. Atrobe amantenan di musica di piano por a inspira ariba e notanan di un cancion clasico toca pa Livio Hermans, pero ta e dinamico y profesional den tur sentido di e palabra, Albert Croes mes mes, "nos Padu chikito" a percura pa e contacto musical inigualabel entre e otro instrumentonan y di curazon a caricia cu su tocamento excelente e oido di e publico presente cu su energia y alegria. Pabien na tur cu a participa y of asisti na un otro dushi concierto dominical Donny Lacle cu e guia di nos cantante exitoso y famoso Edjean Semeleer como un maestro di ceremonia hopi zuiver y transparente, cu un crenchi supervision di nos amiga Joyce Pereira cu a haci e trabao bunita aki pa hopi aña tras di otro, pero cu awor ta wordo ehecuta pa Edjean, kende tambe a canta di sorpresa un bunita cancion, recordando e cantante Lidwina Booi, un di e yiunan muhe di Lio, cu a yega di canta e cancion aki, pero cu ta bibando na Hulanda. Otro yiu talentoso y inspira di Shon Lio, cu stem bunita angelical den su cantamento ta Antonieta, e biaha aki sinta den publico cu e resto di famia

Booi. Ki dia nos por gosa di su bunita canto , acompaña pa un banda musical hopi great tambe? *(Tip pa Edjean y Joyce...)

E tabata un diadomingo yena atrobe cu amor pa nos hendenan di nos dushi Aruba. Mi ta termina mandando un sunchi riba frenta di Lio y un specialmente riba frenta di Padu.

Sigur henter pueblo ta corda ainda e dushi fiesta di Padu , dia el a cumpli su di 90 aña di edad.

Lio y Padu ta nos pilarnan cu ta transmiti hopi amor pa tur loke ta cultura den su dulzura. Nos a save the best for last, y esaki ta, nos palabranan di danki special pa Diet y John Booi, kende a deleita nos tur, pero especialmente Shon Lio cu algun cancion toca riba su sinfonia di boca. Un fiesta cu e melodianan precioso toca pa John Booi semper ta completo, ta bon mes mi a core cuminde prome cu Diet a hibe pa nan por a sigui gosa di nan dushi y bunita diadomingo, cumpli cu mas di nan deseonan. Y te akinan, mi deseo pa un dushi dia yen di alegria, harmonia y energia positivo. Danki pa e espacio y danki pa lesa mi reseña.

